

# 1 TESALONAIKA

<sup>1</sup> Iga Pol na Sailas na Timoti na iga qalub anjam endi nengrenyosim ningi Tesalonaika qureq di loueqnub qaji nungoq qarinyonum. Ningi Tamo Koba Yesus Kristus aqa Abu Qotei wo nanngi aiyel beternjrejunub.

Qotei a ningi qa are boleiyimqa ningi lawo na soqniy.

*Tesalonaika Kristen nanngi Yesus qa nanngo areqalo singilateb*

<sup>2</sup> Iga gaigai ningi kalil qa pailyoqnsim Qotei binjiyeqnum. <sup>3</sup> Ningi Yesus qa nungo areqalo singilateqnu deqa ningi kumbra bole bole yeqnu. Osib ningi qalaqalaiyo kumbra dauryoqnsib wau bole ojeqnu. Mondon gago Tamo Koba Yesus Kristus a olo bqas. Ningi a qa tarinoqnsib singila na tigelejunub. Iga nungo kumbra deqa are qaloqnsim gago Abu Qotei binjiyeqnum. <sup>4</sup> O ijo was kalil, Qotei a ningi aqa segi qa marsiq giltngej deqa a na ningi tulan qalaqalaingeqnu. Di iga qalieonum.

<sup>5</sup> Iga nami Yesus aqa anjam bole nungoq osi bem. Iga lanja anjam maro na osi bosai. Iga singila ti Mondor Bole ti areqalo bole ti dena osi bem. Ningi qalie, iga nungo ambleq di sosim kumbra boledamu yoqnsim ningi aqaryaingoqnem.

<sup>6</sup> Ningi Qotei aqa anjam ojesoqneq deqa gulbe gargekoba nungoq di brantoqnej. Bati deqa ningi gago kumbra ti Tamo Koba aqa kumbra ti dauryoqneq. Ningi uratosaiogneq. Mondor Bole na nungo areqalo tigeltetngoqnej deqa ningi tulan

areboleboleinḡoqnej. <sup>7-8</sup> Niḡi Tamo Koba aqa anjam palonteqnab anjam di giloqnsiq Masedonia sawa ti Akaia sawa ti dia brantoqnej. Deqa sawa dia tamo uḡsari kalil Yesus qa naḡo areqalo siḡilateqñub qaji naḡi nuḡo kumbra qa qu-qnsib dauryeqñub. Sawa dia segi sai. Sawa sawa kalilq di dego niḡi Qotei qa nuḡo areqalo siḡilateb deqa saoqnsib laqñab tamo uḡsari naḡi quekriteqñub. Deqa uḡgum, iga aitentosiḡ nuḡo kumbra deqa olo mare mare laqasai. <sup>9</sup> Iga nami nuḡo ambleq di sonamqa bati deqa niḡi gago anjam dauryoqñeb. Nuḡo kumbra deqa sawa sawa kalilq di tamo uḡsari naḡi saoqnsib laqñub. Niḡi are bulyosib gisaḡ qotei naḡi torei uratnjsib Qotei bole agi ḡambile gaigai unu qaji a areiyosib waueteqñub. <sup>10</sup> Osib niḡi Qotei aqa Njiri a laḡ qureq na bqaḡqa deqa tariḡoqnsib unub. Nuḡo kumbra deqa dego sawa sawa kalilq di naḡi saoqnsib laqñub. Qotei aqa Njiri di agi Yesus. A moinaqa Qotei na olo subq na tigeltej. A na iga padalo sawaq na elenej deqa mondoḡ Qotei aqa minjiḡ oqwa bati boqñimqa iga aqa minjiḡ di turqasai. Iga so bole gaigai sqom.

## 2

### *Pol a Tesalonaika Kristen naḡo ambleq di wau bole yoqnej*

<sup>1</sup> O ijo was niḡi segi qalie, iga nami nuḡoq bosim nuḡo ambleq di wauoqñem gago wau di laḡa uloḡosai. <sup>2</sup> Niḡi qalie, iga nuḡoq bosaisosiḡimqa iga Filipai qureq di Qotei aqa wau ojeqñam jeu tamo naḡi na iga jaqatiḡ

egoqnsib ugeugeigoqneb. Bunuqna iga nungo qureq bonamqa dia dego jeu tamo nanği na iga ugeugeigoqneb. Gago Qotei na gago are singilatetgej deqa iga jeu tamo nanği qa ulaosai. Iga singila na tigelooqnsim Qotei aqa anjam bole ninği merngoqnem. <sup>3</sup> Bati deqa iga ninği endegsi merngoqnem, “Ninği Yesus qa nungo areqalo singilatiy.” Iga anjam uge bei ninği merngosaiioqnem. Iga nungo ambleq di sosim kumbra jiga ti gisan kumbra ti yosaiioqnem. <sup>4</sup> Qotei a segi gago kumbra tenemtoqnsiq une bei unosaioqnej deqa a na iga wau egsiqa mergej, “Ninği ijo anjam bole mare mare laqniy.” O ijo was, mandam tamo nanği gago wau qa arearetnjroqnqajqa iga deqa are qalosaiioqnem. Iga endegsi are qaloqnem, “Qotei a segi gago are miligi peleiyoqnsim gago wau qa arearetoqnqas.” <sup>5</sup> Ninği qalie, iga walawala anjam bei ninği merngosaiioqnem. Osim nungo inği inği qa maulgonaq laņa gisan na anjam palontosaioqnem. Qotei a segi gago kumbra qa qalie. <sup>6</sup> Iga wauoqnem di ninği na kiyo tamo qudei na kiyo gago ñam soqtetgwajqa deqa wauoqnem e? Sai. Iga deqa wauosaiioqnem. <sup>7</sup> Bole, iga Kristus aqa wau tamo bole unum deqa iga ninği endegsi merngwa kere, “Ninği silali inği inği qa aqaryaigoqniy.” Ariya iga degyosai. Iga nungo ambleq di anğro kiñilala bul lawo na soqnem. Ai nanği na nanğo anğro mom nanği munğum anainjreqnub dego kere iga nungo ai bul sosim ninği gereinğoqnem. <sup>8</sup> Osim iga ninği tulan qalaqalainğoqnem. Deqa iga nungo silali inği inği yainğwajqa are qalosaiioqnem. Iga Qotei aqa

anjam bole ningi mernḡwajqa deqa are qaloqnem. Di segi sai. Iga gago segi ḡambile dego uratosim ningi aqaryaingwajqa are qaloqnem. Di kiyaaqa? Ningi gago Kristen was bole unub deqa.

<sup>9</sup> O was ningi qalie, iga ningi koba na sosimqa Qotei aqa anjam bole mernḡoqnem bati deqa iga waukobaoqnem. Iga ningi gulbe enḡwa uratosim deqa gago segi ban na qanam ti qolo ti tulan siḡgila na wauoqnem. Osim dena gago segi inḡi inḡi awaiyoqnsim uyoqnem. Ningi iga silali qa aqaryaigwajqa deqa mernḡosaioqnem.

<sup>10</sup> Ningi Yesus qa nunḡo areqalo siḡgilateqnu qaji iga na kumbra bole bole osornḡoqnem. Iga kumbra uge bei osornḡosaioqnem. Iga Qotei aqa ḡamgalaq di kumbra bole tintiḡ nunḡo ambleq di yoqnem. Di ningi qalie. Qotei a dego qalie.

<sup>11</sup> Abu nanḡi na nanḡo anḡro nanḡi tingitnḡroqnsib dalnḡreqnu dego kere iga ningi tingitnḡoqnsim dalnḡoqnem. <sup>12</sup> Iga ningi deḡnḡoqnem. Di kiyaaqa? Ningi kumbra Qotei a tulan areareteqnu qaji di yoqnsib walweloqnaqajqa deqa. Qotei aḡi a na ningi endegsi metḡej, “Ningi ijoq babqa e nunḡo Mandor Koba sosiy ningi taqatḡitqa ningi lan qureq di so bole gaigai sqab.”

### *Tesalonaika Kristen nanḡi gulbe qoboioqneb*

<sup>13</sup> Iga Qotei aqa anjam ningi mernḡeqnam ningi quoqnsib endegsib are qalosaioqneb, “Anjam di mandam tamo nanḡo anjam.” Sai. Ningi are qaloqneb, “Bole, anjam di Qotei aqa anjam tintiḡ.” Deqa bini Qotei aqa anjam di nunḡo are miligiq di siḡgila na wauoqnu. Di kiyaaqa? Ningi Yesus qa nunḡo areqalo siḡgilateb deqa. Utru deqa iga

gaigai Qotei biñiyeqnum. <sup>14</sup> O ijo was, tamo ungasari Judia sawaq di Kristus Yesus aqa Abu Qotei wo qa loueqnub qaji nango kumbra agi ningi dau-ryeqnub. Tamo ungasari nangi di Juda nangi na gulbe koba enjroqneb dego kere nungo segi len qujai nangi na ningi gulbe koba engeqneb. <sup>15</sup> Juda nangi na Tamo Koba Yesus qalsib moyoteb. Nangi nami Qotei aqa medabu o qaji tamo nangi dego ñumoqnsib moyotnjroqneb. Osib iga dego wig-onab iga nungo qure uratosim jaraiyem. Juda nangi di kumbra Qotei a tulan areareteqnu qaji di gotranjoqnsib tamo ungasari kalil nangi jeutnjreqnub. <sup>16</sup> Osib iga na sawa bei bei qaji nangi Qotei aqa anjam minjrqa yeqnam gam getentetgeqneb. Qotei na sawa bei bei qaji nangi elenaim deqa Juda nangi na gam getentetgeqneb. Deqa nangi bati gaigai nango segi une tumbol ateqnub. Nangi kumbra degyeqnub deqa Qotei aqa minjin bosiq nangoq di unu.

*Pol a Tesalonaika Kristen nangi olo unjrqaqqa are koba qaleqnu*

<sup>17</sup> O ijo was, Juda nangi na iga wigebe deqa iga ningi uratngosim bati truquyala sawa beiq di soqnem. Deqa iga nungo ulatamu unosaieqnum. Ningi gago are miligiq di unub deqa iga ningi ti sobulejunum. Deqa iga nungoq olo bosim nungwajqa gam ngameqnum. Iga ningi olo nungwajqa are koba qaleqnum. <sup>18</sup> Od, iga nungoq olo bqajqa are unu. E Pol e segi bati gargekoba nungoq olo bqajqa yeqnam Satan na iga gam getentetgoqnej. <sup>19</sup> Mondon gago Tamo Koba Yesus a lan qureq na bamqa bati deqa iga ningi qa are singilatosim

Yesus aqa n̄amgalaq di tulan areboleboleigwas. Yim Yesus na mergwas, “N̄ingi ijo wau tamo bole.” O ijo was, bati deqa iga n̄ingi qa tulan areboleboleigwas. <sup>20</sup> Od, bini dego iga n̄ingi qa tulan areboleboleigeqnu. N̄ingi na gago are tulan boletetgeqnu.

### 3

#### *Pol a Timoti qarinyonaq Tesalonaika Kristen nan̄goq gilej*

<sup>1</sup> Iga n̄ingi qa are kobaigoqnej. Deqa iga are qalem, “Ūngum, iga olo tarinqa keresai. Aqo Sailas wo Atens qureq endi sqom.” <sup>2</sup> Iga degsi are qalsimqa Timoti qarinyonam n̄un̄goq gilej. Timoti a gago Kristen was bole. A Qotei aqa wau tamo. A Kristus aqa anjam bole maro qaji tamo. A n̄ingi aqaryaingosim n̄un̄go areqalo Yesus qa singilateqnu qaji di olo singilatetngwajqa deqa osim qarinyonam n̄un̄goq gilej. <sup>3</sup> Gulbe ti jaqatin̄ ti n̄ingi eqnu qaji dena n̄un̄go areqalo ugetetngaim deqa marsim Timoti qarinyonam n̄un̄goq gilej. N̄ingi qalie, Qotei a nami n̄ingi ti iga ti gulbe oqajqa marsiq giltgej. <sup>4</sup> Agi iga n̄ingi koba na sosimqa endegsi mern̄goqnem, “Gulbe gargekoba gagoq boqn̄qas.” Mern̄geqnam gulbe agi gagoq di brantoqnej. Di n̄ingi qalie. <sup>5</sup> Utru deqa e tarinqa keresai. N̄ingi n̄un̄go areqalo Yesus qa bole singilateqnu kiyo sai kiyo di e qalieqajqa deqa Timoti qarinyonam n̄un̄goq gilej. E endegsi are qalem, walawalaiyo tamo Satan na n̄ingi uneq wain̄gonaqa n̄ingi gago wau lan̄a ulontosib n̄un̄go

areqalo Yesus qa singilato qaji di urateb kiyo? Degsi are qalsim are kobaiboqnej.

*Timoti a olo bosiq Pol minjej, “Tesalonaika Kristen nanjo so bolequja”*

<sup>6</sup> Ariya Timoti a nunjoq gilsiq a olo uratngsiqa aqo Sailas wo gagoq di brantosiqa anjam bolequja endegsi mergej, “Tesalonaika Kristen nanji Yesus qa nanjo areqalo singilatoqnsib segi segi qa qalaqalaiyo kumbra yeqnub. Osib gaigai ningi qa are boleinjreqnu. Ningi nanji unjrqaqqa are koba unu dego kere nanji kamba ningi nungwajqa are koba unu.” <sup>7</sup> O ijo was, ningi Yesus qa degsib nunjo areqalo singilateqnu anjam di Timoti a bosiq aqo Sailas wo saigonaqa anjam dena gago gulbe kalil qa olo are singilatetgej. <sup>8</sup> Deqa iga qalieonum, ningi singila na Tamo Koba aqa ñam ojejunub. Iga di qalieosim deqa bini iga so bole unum. <sup>9</sup> Iga ningi qa are qaloqnsim deqa iga gago Qotei aqa ñamgalaq di tulan areboleboleiqnu. Gago arebolebole di tulan kobaquja. Qotei na arebolebole di iga egej deqa iga a binjiyeqnum. <sup>10</sup> Iga qanam ti qolo ti endegsim Qotei pailyeqnum, “O Abu, ni na odgimqa iga Tesalonaika Kristen nanjoq gilsim unjrjom. Unjrsim nanjo areqalo Yesus qa singilateqnu qaji di truquinjrimqa iga na olo singilatetnrjom.” Iga degsim Qotei pailyeqnum.

*Pol a olo Tesalonaika Kristen nanjoq gilqajqa are qaleqnu*

<sup>11</sup> Gago are koba endegsi unu. Gago Abu Qotei wo gago Tamo Koba Yesus wo nanji aiyel na gam waqtetgibqa iga nunjoq olo giljom. <sup>12</sup> Gago areqalo bei dego agiende. Tamo Koba a na ningi

aqaryainḡimqa qalaqalaiyo kumbra nuḡoq di tulan kobaeme. Amqa niḡi segi segi qa qalaqalaiyo kumbra yoqnsibqa tamo uḡasari kalil naḡi dego tulan qalaqalainjroqniy. Agi iga na niḡi tulan qalaqalainḡeqnum dego kere. <sup>13</sup> Kumbra dena Qotei a nuḡo are miligi siḡilatetḡimqa niḡi aqa segi kumbra bole dauryoqnsib tamo uḡasari tulan bolequja brantosib gago Abu Qotei aqa ḡamgalaq di une saiḡoji soqniy. Soqniḡ mondonḡ gago Tamo Koba Yesus na Qotei aqa segi tamo uḡasari kalil naḡi laḡ qureq dena joqsim bḡas. Bole.

## 4

### *Niḡi sambala kumbra kalil torei uratiy*

<sup>1</sup> O ijo was, kumbra bole kalil Qotei a tulan areareteḡnu qaji di iga na nami niḡi osorḡoqnem. Kumbra di agi niḡi dauryeqnub. Ariya bini iga nuḡo are miligi siḡilatetḡosim Tamo Koba Yesus aqa ḡam na endegsi mernḡwom, “Niḡi kumbra bole di olo torei siḡilatosib yoqniy.”

<sup>2</sup> Anjam kalil iga nami Tamo Koba Yesus aqa ḡam na niḡi mernḡoqnem qaji di niḡi segi qalie.

<sup>3</sup> Anjam agiende. Qotei aqa areqalo agi ubtosiy marqai. Niḡi aqa segi kumbra boleq di sosib sambala kumbra kalil torei uratiy. <sup>4</sup> Osib niḡi nuḡo segi so geregere taqatiy. Niḡi deḡyqab di niḡi Qotei aqa segi kumbra boleq di sosib ḡam bole oqab. <sup>5</sup> Yimqa nuḡo areqalo uge uge na niḡi titḡosim sambala kumbraq di breiḡwasai. Niḡi qalie, tamo uḡasari Qotei qaliesai qaji naḡi sambala kumbra dauryoqnsib unub. <sup>6</sup> Ariya niḡi



kumbra di uratiy. Niŋgi na nuŋgo Kristen was naŋgi kumbra uge bei osornjraib. Osib naŋgi gisaŋnjrsib naŋgo ŋaun ugetnjraib. Tamo Koba a na tamo uŋgasari kumbra uge deqaji yeqnuv qaji naŋgi awai uge enjrqas. Iga nami niŋgi siŋgila na degsi merŋgoqnem. <sup>7</sup> Qotei na iga kumbra jigat yqajqa metgosai. Iga aqa segi kumbra boleq di sqajqa deqa metgej. <sup>8</sup> Deqa tamo bei a gago anjam endi gotraŋyqas di a kumbra tulaŋ ugedamu yqo. A tamo naŋgo anjam gotraŋyosai. A Qotei aqa anjam gotraŋyqo. Qotei agi a na aqa Mondor Bole niŋgi eŋgeqnu.

*Niŋgi qalaqalaiyo kumbra torei siŋgilatosib yoqniy*

<sup>9</sup> Niŋgi nuŋgo Kristen was naŋgi qalaqalainjreqnuv deqa e olo anjam bei totoryosiy nenŋrenyqasai. Qalaqalaiyo kumbra di Qotei na osornjgekritej. <sup>10</sup> Agi niŋgi na Masedonia Kristen kalil naŋgi tulaŋ qalaqalainjreqnuv. Ariya ijo was, iga nuŋgo are siŋgilatetŋgimqa niŋgi qalaqalaiyo kumbra di olo torei siŋgilatosib yoqniy. <sup>11</sup> Osib lawo na sosib nuŋgo segi iŋgi iŋgi taqatosib nuŋgo segi baŋ na wauoqniy. Anjam di iga nami niŋgi merŋgoqnem. <sup>12</sup> Niŋgi degsib wauoqniyqa niŋgi iŋgi bei qa truquingwasai. Deqa tamo uŋgasari Yesus qaliesai qaji naŋgi nuŋgo kumbra di unsib tulaŋ areboleboleinjrqas.

*Yesus a olo bosim tamo uŋgasari moreŋo qaji ti ŋambile unub qaji ti naŋgi koba na sqab*

<sup>13</sup> Ariya ijo was, tamo uŋgasari nami moreŋeb qaji naŋgi mondon kumbra kiye turqab di niŋgi qalieqajqa deqa merŋgwom. Yim niŋgi naŋgi qa

are gulbeinḡwasai. Tamo unḡasari Qotei qaliesai qaji nanḡi subq na tigelo bati qa tariḡosaieqḡnub. Deqa nanḡo was bei a moiḡas di nanḡi tulaḡ are gulbeinjḡqas. Ariya ninḡi deḡsib are gulbeinḡwasai. <sup>14</sup> Yesus a moisiḡa olo subq na tigelej anjam di ninḡi iga ti gago areqaloḡ di siḡilatejunum. Deqa iga qalieonum, mondoḡ Qotei a tamo unḡasari kalil Yesus ombla sosib moreḡeb qaji nanḡi subq na tigeltḡnjrimqa nanḡi Yesus beteryosib koba na laḡ qureḡ na mandamḡ aiqab.

<sup>15</sup> Iga Tamo Koba aqa anjam ninḡi endegsi merḡḡwom. Mondoḡ Tamo Koba a mandamḡ aiyocḡnimqa iga ḡambile unum qaji iga na tamo unḡasari nami moreḡeb qaji nanḡi buḡnjrsim namo oḡsim Yesus itḡasai. <sup>16</sup> Qotei a anjam siḡila na marimqa laḡ anḡro matu a leleḡoqḡnimqa Qotei a gul anjamḡas. Yimqa Tamo Koba Kristus a laḡ qure uratosim mandamḡ aiyocḡnimqa tamo unḡasari nami Kristus qa nanḡo areqalo siḡilateḡsib moreḡeb qaji nanḡi namo subq na tigelqab. <sup>17</sup> Tigelabqa bati deqa iga ḡambile unum qaji iga ti nanḡi ti turosim koba na laḡbiḡ na oḡsim Tamo Koba a itḡom. Osim a ti gaigai sqom. <sup>18</sup> Deqa ninḡi anjam di Qotei aqa tamo unḡasari nanḡi minḡroḡnsibqa dena nanḡo are siḡilateḡnjroḡniy.

## 5

### *Yesus a bqajqa bati tamo bei a qaliesai*

<sup>1-2</sup> O ijo was, Tamo Koba Yesus a bati gembu bqas di tamo bei a qaliesai. A bqajqa bati di bajinḡ tamo bul brantḡas. Bajinḡ tamo nanḡi qolo beḡḡnub

dego kere Yesus bqajqa bati di lumu brantosim tamo ungasari nanği pruatnjrqas. Ningi di qalie deqa iga olo anjam bei totoryosim nenğrenyqasai. <sup>3</sup> Yesus a bosaisoqnimqa tamo ungasari gargekoba nanği endegsib maroqnqab, “Iga so bole unum. Iga inği bei qa ulaqasai.” Degsib maroqnibqa gulbe kobaquja nanğoq di brantoqujatqas. Unğa anğrotqa osiq jaqatin eqnu dego kere. Gulbe di nanği britosib jaraiqa keresai. <sup>4</sup> Ariya ijo was, ningi ambruq di sosai deqa Yesus bqajqa bati di bajin tamo bul bqas dena ningi pruatnğwasai. <sup>5</sup> Ningi kalil pulon aqa anğro. Ningi suwan aqa anğro. Iga qolo qaji tamo sai. Iga ambru qaji tamo sai. <sup>6</sup> Deqa iga nerenjo ani tamo nanği bul sqasai. Iga nam atoqnsim areqalo bole ti sqom. <sup>7</sup> Iga qalie, tamo nanği nerenjeqnub qaji nanği qolo nerenjeqnub. Tamo nanği ya uge uyoqnsib nanarieqnub qaji nanği qolo ya uyeqnub. <sup>8</sup> Ariya iga suwan qaji tamo unum deqa iga areqalo bole ti sosim Qotei qa gago areqalo sinğilatoqnsim qalaqalaiyo kumbra yoqnqom. Gago kumbra di iga qoto qa gara jugo bul jigsim tigelesqom. Osim Qotei na iga padalo sawaq na elenqajqa deqa tariñoqnqom. Gago kumbra di iga qoto qa gate tatal bul atsim tigelesosim nam atoqnqom. <sup>9</sup> Qotei na iga aqa minjin turqajqa giltgosai. Gago Tamo Koba Yesus Kristus na iga elenqajqa deqa giltgej. <sup>10</sup> Yesus a iga qa moiyej deqa iga mandamq endi sqom kiyo iga moiqom kiyo di unğum. Iga Yesus a koba na nambile gaigai sqom. <sup>11</sup> Deqa ningi segi segi na Qotei aqa tamo ungasari nanği anjam bole minjroqnsib dena nanği sinğilatnğroqniy. Agi bini ningi degyeqnub.

### *Niŋgi kumbra bole bole yoqniy*

<sup>12</sup> Ariya ijo was, iga na niŋgi endegsi mernḡwom. Niŋgi nuŋgo Kristen gate naŋgo sorgomq di soqniy. Tamo Koba a na naŋgi gate ateleŋej deqa naŋgi niŋgi aqaryainḡwajqa waueqnuḡ. Wauoqnsib Qotei aqa anjam niŋgi mernḡoqnsib nuŋgo kumbra tingitetḡgeqnuḡ. <sup>13</sup> Naŋgi wau di yeqnuḡ deqa niŋgi naŋgi qa are boleinḡoqnim naŋgi qalaqalainjroqniy. Osib niŋgi nuŋgo Kristen was kalil naŋgi koba na are qujaitosib soqniy.

<sup>14</sup> O ijo was, iga nuŋgo are tigeltetḡgimqa niŋgi kumbra endegiy. Niŋgi na tamo uŋgasari wauqajqa asḡinjreqnu qaji naŋgi tingitnjroqniy. Osib tamo uŋgasari are gulbeinjreqnu qaji naŋgi siŋgilatnjroqniy. Tamo siŋgila saiqoji unub qaji naŋgi dego aqaryainjroqniy. Osib tamo kalil naŋgi lawo na gereinjroqniy.

<sup>15</sup> Tamo qudei naŋgi niŋgi kumbra uge eŋgibqa niŋgi na kamba olo kumbra uge enjraib. Niŋgi na gaigai nuŋgo Kristen was naŋgi ti tamo uŋgasari kalil naŋgi ti kumbra bole osornjroqniy.

<sup>16</sup> Osib niŋgi gaigai areboleboleinḡim soqniy. <sup>17</sup> Sosib gaigai pailyoqniy. <sup>18</sup> Kumbra kiye nuŋgoq di brantoqnim, di uŋgum, niŋgi olo Qotei biŋiyiqnsib minjoqniy, “Ni keretonum.” Qotei aqa areqalo agiende. Niŋgi Kristus Yesus beteryesosib degyoqniy.

<sup>19</sup> Qotei aqa Mondor na niŋgi wau bei yqajqa are tigeltetḡgimqa niŋgi olo getentaib. Niŋgi wau di yiy. <sup>20</sup> Qotei aqa medabu o qaji tamo naŋgi na anjam mernḡoqniḡqa niŋgi naŋgi qa olo are ugeinḡaiq. <sup>21</sup> Anjam kalil niŋgi queqnuḡ qaji di

ningi geregere tenemtoqnsib pegiyuqniy. Osib kumbra kalil dego pegiyuqnsib kumbra bole segi dauryuqniy. <sup>22</sup> Osib kumbra uge kalil uratoqniy.

<sup>23</sup> Qotei a are lawo qa utru. A na ningi torei aqa segi kumbra boleq di atqas. A nuŋgo mondor ti nuŋgo qunuŋ ti nuŋgo jejamu ti kalil taqate-soqnimqa ningi so bole gaigai sqab. Deqa mondon gago Tamo Koba Yesus Kristus a olo lan qureq na bamqa ningi aqa ŋamgalaq di une saiqoji sqab. <sup>24</sup> Qotei agi ningi metŋgej qaji a na ningi aqaryaingimqa inŋi bole kalil di nuŋgoq di brantqas. Qotei a gisaŋ tamo sai. Anjam kalil a mareqnu qaji di a bole dauryeqnu.

<sup>25</sup> O ijo was, ningi iga qa Qotei pailyoqniy.

<sup>26</sup> Ningi na nuŋgo Kristen was kalil naŋgi segi kundoqnriry. Kumbra di agi Qotei aqa tamo ungasari naŋgi yeqnub.

<sup>27</sup> E Tamo Koba aqa ñam na ningi endegsi merŋwai. Ningi na Qotei aqa tamo ungasari kalil naŋgi koroinrsib ijo anjam nenŋrenyonum qaji endi sisiyabqa naŋgi quqwab.

<sup>28</sup> Gago Tamo Koba Yesus Kristus a ningi qa are boleiyeme. Bole.

**Yesus Aqa Anjam Bole 2000**  
**The New Testament in the Anjam language of Papua**  
**New Guinea, 2000 edition**  
**Nupela Testamen long tokples Anjam long Niugini,**  
**2000**

Copyright © 2000 The Bible Society of Papua New Guinea

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2001-01-01

---

PDF generated using Haiola and XeLaTeX on 11 Nov 2022 from source files dated 9 Oct 2020

6bd977a8-0139-583b-a367-c04faf6223cc